

四庫全書

集部

欽定四庫全書

集部  
九靈山房集卷七

詳校官檢討<sub>臣</sub>德生

中書<sub>臣</sub>劉源溥覆勘

總校官庶吉士<sub>臣</sub>倉聖脉

校對官主簿<sub>臣</sub>汪日贊

謄錄舉人<sub>臣</sub>曹夢齡

謄錄貢生<sub>臣</sub>李玉璣

欽定四庫全書

九靈山房集卷七

元戴良撰

山居稿第七

題跋

跋鮮于伯幾所製劉遺安壽詞後

右漁陽公所製遺安使君壽詞一章蓋使君以元勳世  
胄出治外服歷守東南諸大郡一時賢士大夫多出入  
其門今觀漁陽此詞語意既多引重而字畫復致謹不

少放則以久游其門而知敬其人故也按此詞作於辛丑之歲閱明年而漁陽沒又十年而使君亦薨詞為使君家物歷三世尚寶藏無恙而其嗣孫師稷復以文藝為諸公所歸往世澤之滋於是乎在矣吁豈漁陽所謂濟人陰德有以致之耶

三先生手帖後題

友人宋君景濂以三先生所遺手帖聯為卷間出以示良良以三先生學擅一時而一時之人咸仰之望之雖

得其片言隻字不翅如折圭斷璜保護惟謹彼於三先生之學未必能知之而乃貴重之如是者其志在翰墨耳今景濂之為此卷則以久游三先生之門知慕三先生之學顧以存歿相半離合靡常思見其人而不可得因欲即是而見之所以然者本志乎三先生之學也翰墨云乎哉雖然三先生之學亦豈無見於斯自今觀之或制度之有考或文章之有稱或經學之有述蓋皆示景濂以為學者也使景濂無志於三先生之學則已有

志於三先生之學也寧不即是而有得哉良也不敏亦嘗從景濂之後以登三先生之門其於三先生之學曾不能如景濂之有得也故因題卷併志予愧云

題樓彥英詩卷後

士莫不有能為之材也然非值夫得為之時則亦無有可為之事君子之論人又可拘拘於事為之末哉烏傷樓君自其壯年即以智勇聞已而群盜起鄰境勢甚猖橫吏卒咸縮手環視莫敢誰何君乃匹馬往捕擒其罪

首六人者歸之官於是縣府為上其事部使者加審察  
焉文達中書遂遵故事賞其功調浦江之政內鄉巡檢  
時當承平日久聖化涵濡之深雖鼠竊狗偷之伍亦皆  
奔走遠遁職警邏者往往無所用其武故君雖武人巡  
檢雖武職反為之屏旗幟棄鉦鼓日從文儒之士賦詩  
寫竹呼酒以為樂退然若不以武功致官者彼此一時  
何其異哉使君於立功之後仍值夫得為之時以展夫  
能為之材則其事之可言當不止如向之所施而已不

然豈君之武材獨施於未官之前而不施於既官之後耶人之論君顧欲拘拘於事為之末斯亦過矣君今以歲月代去文儒之所與遊者莫不作詩以祖其行良方讀禮山中不及從諸公之後以相與詠歌之因君之出示此卷故為書其出處之大概如此而不暇計其言之不文也

題余廉訪五大篆後

右東澗第一家五大篆武威余公為義門鄭氏書鄭氏



聚居白麟溪之上自其九世祖冲素處士綺以來咸能  
守其家法為之子者必孝於其父為之弟者必恭於其  
兄為之婦者必順於其夫其為父兄夫也亦各以道而  
自盡如是者歷二百餘年不少變至大末有司既為上  
其事於朝號其門曰孝義之門矣至正庚寅夏六月己  
丑公持部使者節分按至浦江復過其居而訪問焉為  
之低徊太息者久之且曰吾於泖水之東已皆按歷之  
矣恒未見如鄭氏之孝義者有孝義如鄭氏可不善其

善以為之勸哉乃為書此於庭曲之石俾其子孫世守之嗚呼鄭氏果何以致是哉謹按東澗統有七郡而七郡之中以州計者六以縣計者三十有五其土地非不廣也人民非不衆也豈無貴極公侯富比封君之家足以見重於一時者今公咸不之取獨於鄭氏而有取焉是果何以致是哉公之此意蓋以屬部之內知孝其父者多矣或於事兄之間而不能以盡恭者有矣能孝於其父恭於其兄或不能致其夫婦之相和者有矣或父

子兄弟夫婦咸盡其道而不能必其九世之遠二百餘年之久猶克守其家法而不墜者有矣凡此數者一有所不能則雖範天下之貨寶不足以為富羅天下之祿爵不足以為貴而其可富可貴者惟在乎鄭氏之孝義也是則鄭氏之家固宜為七郡之稱首而豈無以致是哉雖然非公之表而出之則七郡之民亦無自而知之矣抑予聞之孝義非一家之行而七郡之民莫不盡能之能之而或不為是皆有愧於鄭氏者也不惟有愧於

鄭氏其亦獲戾於公矣公之此舉豈但為鄭氏計哉七  
郡之民猶懼其獲戾於公而況為鄭氏之子孫者繼今  
以往宜益敬守其家法以保有乎此石勿使恃其門望  
之高而不念其累世之勤也吾恐其獲戾於公矣嗚呼  
可不懼哉公唐古氏名余闕字廷心元統癸酉甲科進  
士歷官臺閣今由翰林待制出僉海右道肅政廉訪司  
事云

重刻冲素處士墓銘後題

義門鄭子敬氏間出其晏宣明所作冲素處士墓銘以  
示良且曰處士於予為七世祖墓在家東百步許銘石  
埋墓中而此石本蓋嘗得之宗人處惟是鼠蠹之餘懼  
其久而益壞也固已裝褫成帙請於待制柳公著其作  
銘之始末今復將命工摹刻以傳示吾徒子柳公弟子  
也其幸為我識之哉良嘗往來縣境歷覽百里間問其  
故家遺族於縣人則自宋以來達官貴士之門第往往  
而有然求其子孫以叩其家世之懿乃皆吃吃不能道

一語或得其家乘而觀之其不勝感慨者多矣處士之在當時不過一窮書生然能以孝行率其家至其臨歿猶歃血示子孫毋分居致使遺澤之滋至於久而不泯同門合釜九世如一日是何彼此之或異哉嗚呼孝行之至天地可得而動神明可得而通金石可得而貫况其嗣人宜其豐碩衍裕而無涯哉視彼區區希榮傲寵於一時者又惡得而齊之哉雖然處士之孝行固卓然矣向微宣明之文以為之引重其不隨世泯滅者幾希

是故斯文之在鄭氏不翅如寶玉之在世棄擲埋沒糞土不得掩雖其暫晦於一時又復有収而珍之於他日天之報施處士也若是哉然則處士之子孫其可不務謹其傳哉若子敬者亦無愧乎為處士之子孫矣

跋倪夫人遺事後

蓋自分田制祿之法久不如古而士農工賈之家遂至兼并無藝貧富不均厭飽糧肉者有之操瓢為溝中瘠者有之於斯之時有能以其所餘惠諸鄉邦之不及者

蓋亦天理人心之所發豈必有為而為之哉迨其後也  
天恒報之以福俾其子孫之享有豐盛至於累世而不  
替者是固理勢之宜然而非若人之所計也已暨陽之  
西鄙有倪夫人者故宋進士諱永年母也亦既家富於  
財遂教其子孫當以惠及鄉邦為心歲有羨餘必使縮  
其時直什之二而平糶之以為常一有不遵其教即歛  
獻就寢竟日夕不食子孫肉袒謝罪改之乃已已而倪  
氏卒以忠厚相傳迨今五世之遠二百年之久而其家



之豐盛固自若也或者以為此皆夫人種德之報而不  
知夫人於此曷嘗有一毫計望之心哉雖然向使夫人  
之教其子孫者一不能以若是吾見德惠之罔施而侵  
虐之是恣雖欲求其五世二百年之豐盛又可得乎夫  
人之所以為子孫計者其亦慮之審矣然竊怪夫夫人  
之在當時不過居處閨門之內勤勞饋食之間非有詩  
書之漸染師友之薰陶而其處心積慮之際乃能忠厚  
之如是則世之以大丈夫名者果皆夫人若哉彼其聞

夫人之事其亦少愧矣夫人之四世孫慶予姻也因出  
余觀光氏所錄遺事以相示故輒書而歸之

書柳待制詩後

待制柳公既祠仙華先生於化城精舍且為刻其所著  
墓碣植之其於師友之誼亦云至矣而又歸賦此詩豈  
得無意於其間哉良嘗觀公之詩於所謂淒其十霜露  
墓草今幾宿之句未嘗不為之愴然有感先生沒於至  
治辛酉之春而立祠植碣乃在於至順庚午之冬相去

踰十載而詩中有及於此者固已恨其表著之晚矣抑不知後此又十載而公亦沒其墓草之淒其者迨今亦十霜露而近冢之祠表墓之碣曾無一之或具是何公之待先生者為甚至而後人之於公顧乃若是忍哉良既登公之門而承其訓教固不得不為之有感於斯矣詩為化城所藏今其主僧若空將摹勒入梓以貽諸好事則夫朝誦而莫詠者又安知其不與良同此感也噫此固足以垂勸於後世也夫

劉鏞字說後題

予友許君存仁嘗以叔聲字其徒劉鏞且著文三百餘言序鏞之能聲者甚悉叔聲復求申其說予聞鑄鏞之法必擇精金為之金精矣又必考古制而參合之制合矣又必求良鳧氏審其輕重均其薄厚分其小大而後範模之用具焉蓋金不精則失之滓制不古則失之鄙重輕不審則失之紊薄厚不均則失之雜小大不分則失之混此五失者一有不除鏞固鏞矣其能美於聲哉

是故善為鏞者深察乎此使無一之不備然後會精神  
運索籥一鼓而成植簾而懸之循隧而叩之則噌吰也  
清越也又何其善鳴也甚哉鑄鏞之難也如此今叔聲  
年甫及冠溫馬而易毅馬而方其質信美矣是不猶金  
之至精者耶質既良矣非六藝之書不講非聖賢之志  
不存舍流俗之所習而欲求通於千載之上是不猶考  
古制而參合之者耶二者固不可及又得許君為之師  
許君文懿公之子也其家學之正遠承考亭之傳是不

猶世之良梟氏者耶蚤夜孜孜以仁義鍊之以禮樂銘之懼其偏也扶掖而正之懼其放也攝束而約之是不猶分小大均溥厚審重輕者耶自時厥後德業著乎躬名譽聞於時近而一鄉遠而四海無不知有叔聲是不猶鏞之善鳴噌吰而清越者耶嗚呼以叔聲之名觀叔聲之為學何其似也雖然金之模範梟氏能為之人之模範則師之自為也以近取譬其果有異乎哉揚子雲曰孔子鑄顏淵矣淵固精金也非孔子為之範模能鑄

之乎許君願學孔子者也其必有以鑄叔聲哉

題葉丞相遺墨

良少時嘗讀故禮部尚書王公所撰丞相葉信公墓銘  
而知公平生大節歷官行事之概後三年始從東陽許  
君獲觀公之遺墨蓋君先世有權海寧令者海寧公之  
鄉邑故以此四帖先後遺之其第五帖則與其弟竹友  
家書而因及許令之賢遂皆為許氏子孫所藏嗟乎令  
之距今不百年其家去此不數舍而其愛人戢暴之政

所以致邑人戴之如父母敬之如神明者後生晚出已無從考知必觀此數帖而後見則世之人非附青雲之士而欲垂聲於後世益亦難矣良既得以快觀前修之真蹟而又有以竊窺先達之為人抑何幸歟後學浦江戴良謹題

哀辭

張如心先生哀辭

并序

予自童州中即聞張君如心之名甚熟已巳之歲始



獲見君於邑下君方與一二耆人長德從容鄉校間  
我冠襖衣掀髯聳目張拱而肅趨有足以壯威儀存  
矩度者予時雖未暇叩其問學之淺深然觀其動作  
之間固以知其為信厚君子矣自後挈挈道路不得  
數從之遊而君亦教授於外不常家居如是者十年  
及予受室於邑之趙氏去君之居為甚近君歲時來  
歸乃相與往來如平生歡君晚得脾病顧已憊甚坐  
起不自遂每聞予至猶強扶出迎道古今事變前賢

踪跡亶亶若珠比鱗列予然後知君種學之深凡其  
動作之見於外者果非偶然也公家故貧室廬不足  
以容膝衣食不足以給體而氣高自足無所仰於人  
環堵蕭然有書數百卷隕然自放用是尊官要人鮮  
克知之大德中年將五十始用薦者起為縣文學尋  
以母老辭去平居無他嗜好惟肆其意於歌詩善偶  
儷工篆籀精楷法而士子評里黨之宿學蓋未嘗後  
君也嗚呼君今其死矣新學晚生夫所於歸而吾邑

之文獻將遂絕予方悲不自勝而君之子端臣請予  
為辭以哀之乃為追述平生而為其文曰

瞻彼仙巖其高萬仞鬱穹窿有美一人鍾竒孕秀潛其  
中吁嗟美人受質孔弱志則充無脂無韋分甘處悴家  
四空日閱其儲飯有脫粟羹芥菘人不我堪我躬甚泰  
色甚雍深衣大帶儼存矩度無墜恭學徒駿奔聆厥風  
旨覲禮容我年未冠猶雀方乳鹿方茸歲時相過稱詩  
誦文好甚隆執手謂我曰予之志我所同願作昌黎低

頭東野為雲龍我方藉之如石就鑿金就鎔孰神之苛  
一朝奪使翳蒿蓬著舊盡矣狐號歛舞靡若風顧瞻我  
里溟濛決漉吾曷從奈之何哉有崇斯土元以宮嗟彼  
牧人毋登其隴翦其松

吳先生哀頌辭

并序

先生婺浦江人諱萊字立夫集賢大學士榮祿大夫  
吳公子也至正元年十月某甲子以疾卒於家得年  
四十有一嘗一試於禮部不中二子諤謚葬先生於

某原葬後一年命良為辭以哀之良雖不敏然嘗承學於先生誼不得辭乃為追述平生而為其文曰

檀車既堅兮駟馬既良出門折軸兮竟斥棄乎康莊嗟嗟夫子兮胡實類之天不可測兮道不可常昔夫子之有生兮體孑孑其羸尪雖求師與取友兮曾不遠違乎故鄉遂取則夫前修兮亦既蹈乎大方入書林而馳騫兮闖藝苑以翱翔奈學業之已修兮尚名譽之未彰豈不登名於一薦兮曾不假翼於鸞鳳乃娛憂以舒憤兮

寫鬱紆而成章曰有侯乎千載之下兮庶無掩乎斯文  
之耿光人固有偃蹇於一時兮終前困而後昌何夫子  
之齋志以死兮卒無以自副其所望夫子之貌不可見  
兮幸微言之在耳尚炯乎其難忘撫遺編以長喟兮仰  
視天之茫茫彼嚴霜之夏墜兮胡獨瘁此衆芳昔河東  
之挺生今年四十而云亡今夫子之洵美兮亦壽命之  
不長已焉哉小人有得其年兮君子有遘其殃自古莫  
不然兮我又奚傷

按潛溪集吳先生以至元六年四月卒年四十四以至正元年十月葬序中所云疑傳寫之誤殿泗謹識

### 吳原伯哀辭

并序

原伯世為婺之蘭溪人諱深其字原伯國子博士吳先生正傳之子也年二十有一至正元年五月庚申以疾卒家既卒之明年其友戴良為辭以哭之嗚呼吾尚忍哭吾友也耶吾固不謂原伯之止於斯耶始予既冠往往聞原伯名於朋友間前年夏予舟次溪許遂與原伯會原伯乃欲相率以為友與之游數日

樂甚固已竊喜先生之有子而予之得友也嗚呼孰謂別未三載而遽哭吾友耶孰謂原伯之遂止於斯耶原伯容貌嶷嶷平居若不能言其取友問學急於飢渴至於群兒嬉戲則畏避如懦夫然每篝燈挾冊雖疾病不休倦則假寐凝思以求聖賢之心有疑則進而質之父師退而與其弟沉私相講辨故其父子兄弟之間雍雍睦睦而自為師友君子是以知其於孝友最隆也去年秋先生被召入京師未幾上原



伯名於國子學於是原伯始欲崎嶇數千里就學於  
京而病已作閱數月遂卒嗚呼其可哀也已昔韓滂  
之在韓門讀書作文功力兼人年十九而卒今原伯  
之為吳氏子固有韓氏之家聲學又不下於滂而亦  
以早死豈殃慶之不以其類概如是耶抑原伯獨不  
幸偶類之耶以予之重有悲於原伯而知先生之悲  
也抑深矣故述哀辭一篇以解其悲哀以舒予憤云  
其辭曰

嗟原伯兮鄉之良質甚粹兮才甚長睨秦漢兮刮虞唐  
騁雄辨兮爛文章射星斗兮奪光芒闡幽秘兮揭正陽  
斂予飾兮儘迴翔暢厥實兮暉煌煌履至訓兮蹈大防  
兄弟雍兮親樂康羽既就兮勢乃揚望白雲兮期帝鄉  
帝鄉遠兮天一方命飈車兮騁康莊豐隆遇兮靳不將  
忽被髮兮下大荒嗟原伯兮志實強何中路兮蹶超驤  
命固屈兮譽則彰願父母兮勿永傷彼羣黎兮直糝糠  
名隨身泯兮孰濯其芳嗟原伯兮獨耿光雖天則困兮

猶壽而昌

陳彥正哀辭

山礐礐兮水瀏瀏下土漠乎其廣大兮吾何此焉是留  
惟擇里以處仁兮乃前志之嘉猷倘有人焉其足藉兮  
寧遠舉以遐游噫夫人之挺生兮信喜能而好修探往  
聖之逸軌兮仰先哲之洪休道雖隱而必履兮理雖微  
而必抽紛吾既有此內美兮仍剗剛以為柔哀白日之  
不與兮冀匠氏之一收苟吾材之適用兮又何問梁棟

之與薪樵亦既登名於仕籍兮曾素志之不酬雖不酬亦何傷兮有自得之悠悠昔先子之詔予兮謂時俗之方偷獨夫人之超卓兮固君子之所周吾方恃之以有濟兮暮驚浪之漂舟凌大江之漫漫兮幾如是而不自陷於中流既相我者之不憇兮又何為乎舊邱行躑躅而無從兮念去此而奚投假大龜以視兆兮將駕馬以行輶已矣哉死者不可作兮吾雖居此其誰儔

蔣季高誄辭

并序

亡友蔣允升字季高婺之東陽人也善讀書工古文  
辭知名朋友間丁酉歲家居遘疾竟不幸夭死予方  
避兵萬山中距其家遠甚不得一撫其櫬以盡其哀  
因追思其平生可列者為文以誄之誄曰

茫茫大鈞孰秉化樞清汨幹流參差報施惡不常釁善  
不常禔貞馬而天狼馬而蒼謂天聽卑我是用疑哀哀  
夫子亦孔之辜惟子之先爽葉紛敷邁列言言垂聲吳  
吳爰暨乃考養德益腴篤生吾子誕茂淑姿如鹿之茸

如鸞之雛亦既弱冠克構堂基其文與學日動里閭子  
之為學潛心以稽鈎深索隱探頤研幾何經不窮何史  
不推上下百代指掌而窺子之為文惟古是師簡不遺  
理繁不費辭譬彼錦績五采爛如等輩爭取朝玩夕披  
人覩其著莫究其微道既克明動罔不宜義以為閑禮  
以為興孝實蒸蒸友亦怡怡在家而理在國必治凡厥  
未試我惟子知子之在世蓋亦庶幾苟遂遐年疇克似  
之庭梧挺秀方茂其枝荆玉蘊璞將獻於時云胡一日

光掩芳萎嗚呼哀哉元首兮未華壯志兮竟隳逝日兮  
何長生年兮須臾俄舊宇兮改觀乃遽襲兮遺衣少妻  
兮嗷嗷幼子兮呱呱魚駭躍兮同感烏哀嗚兮增歎豈  
外物兮有遷固歡悲兮情移嗚呼哀哉撫氣化之盛衰  
念逝者之莫追奈輶車之在側將俟時而啟途魄黝黝  
兮魂飛飛子去我兮何歸既顧瞻之靡及庶陳情於素  
旗嗚呼哀哉

朱茂清哀辭

并序

茂清朱漳世為婺之烏傷人其家距縣五十里近茂清嘗以事至縣謁縣大夫歸俄而疾作竟死年四十年初予客郡城寄郡東門外家焉一日郡兵戕其帥城門晝閉城外居民即謹無男女老幼空其室盡行予亦挈妻子登舟遡流至烏傷境因自歎去家遠行索枵然無以給予材性下又無他伎術搖動人又不得好義個儻之士以相倚予其不為溝中瘠也其幾矣為是憂之甚既而遇茂清於道途茂清乃迎入其



家見其子姓已卽館之別室飲食供張無一不如意者留茂清家踰二月而郡民之道還者踵至予亦買舟竟去且別泣而言曰予去茂清而歸予其誰與處耶他日或還山或仍客郡城予卽不能往茂清其過我耶茂清曰是亦漳之言也予既復居郡東門且將致茂清雙溪上而或以茂清訃聞予時雖哽塞不勝莫詰茂清死狀然不敢卽哭之者猶冀訃者之或妄後會伯清至其言與訃者同伯清茂清之宗也嗚呼

茂清之死為不妄矣茂清善讀書有幹蠱長材然樂  
為人解紛居丹溪之上而丹溪之人愛慕之其長老  
教其子弟必以茂清為言其鄉鄰之鬪爭無訴者宗  
族之顛連無告者皆曰自茂清亡使吾無所依而生  
以為恨茂清嘗買宅一區買田數頃將以贍其族人  
云噫茂清之賢如此而竟止於此豈非其命也夫子  
既悲茂清之死而又悲予之生而無助也辭斯作  
維材之良維行之臧維壽命之不長嗚呼天其不予相

也如之何弗傷

祭文

祭先師柳待制文

嗚呼先生文場之帥士林之雄天既生之其必有意將  
豐將隆先生之生雅厚英邁越自成童展也得師蚤叩  
巖南繼謁仁翁衆理之淵至道之腴遂燭而融乃充新  
得斂彼豪英一變溫恭先生曰嘻庶廣見聞觀厥會通  
龐材碩德一二徧參有符其同遂發緒餘衣被海內揚

厲文風王公戚里絨幣走門惟日憧憧二十年間穹龜  
鉅碑照耀提封我業已修曰驗於為以攄厥鍾寶艱初  
試邑校州庠繼登辟雍青衿胄子聞羶而附鼓篋而從  
司誅奉常領教儒臺聲甚颯颯包茅有貢覆溺江湖再  
歲而逢先生疏之俾附輶傳以活疲瘵從祀匪德禮官  
憚威莫敢告忠集議之頃先生折之氣厲言雍及涖洪  
都曾未期月教雨其濛乃嚴矩範乃聘名師乃飭儒宮  
我疆我理先生正之慚屈盲聾已則有粟先生均之廩

士告豐報政而歸蜀山之下浦泖之東飲水著書熟薪  
照字歲且十終四海環胸英聳如山炳煥猶龍飛剡交  
章論薦公車上達帝聰帝曰俞哉命掌厥制士論稱公  
而今而後庶其大用以收厥功天胡不仁賀轍未安門  
已弔凶嗚呼先生今其已矣士失所宗良也登門幾年  
於茲肇自童蒙月夕風晨娑娑誘掖猶記德容教我食  
我戒我勸我在麻之蓬臨別謂我若子之質纖而必洪  
寤茲賤寒乃我之責可不薦庸我觀先生我得我失若

關厥躬一朝棄我山摧谷崩事若夢中先生之生位不  
滿能亦云顯崇先生之年踰七望八孰曰非翁得正而  
斃固亦無憾我意不充哲人其萎道日淪喪孰繼遐踪  
我悲先生夫豈我私亦哀道窮輒車既駕恭陳薄奠矢  
辭告衷嗚呼先生魂魄毅兮鑒我哀恫

大人祭柳待制文

嗚呼哀哉委河海不足以盡公之閱博雄深披星斗不  
足以喻公之華辭麗筆當其創意遺言搖毫行墨下追

班馬上睨莊屈莫不陶鎔乎神化陵駕乎儔匹而况律  
已溫恭接人忠實行非難繼而動有典常言不乖忤而  
心存整飭追古人而與徒豈庸態之能測信人物之標  
表誠當代之英特至於居官涖事務殫厥職緒正奉常  
之儀禮化洽成均之訓迪提文印於儒臺啟藏書於石  
室皆足以垂譽來今騰輝古昔然而官僅階於五品祿  
不上於千石曾未得歷禁林之獻納究蘭臺之撰述何  
鳳翥而鵬飛忽颺散而星沒嗚呼哀哉國殞其良孰為

衡石人殄厥師莫有矜式彼搢紳之在位因匍匐而凋  
恤糾公之棺者有以駭都門之見聞臨公之喪者有以  
興閭巷之楚惻况某等近連姻婭早蒙振拔當靈車之  
遠還情怳怳以何極瞻荆山之故墟日徜徉乎履舄曾  
歲月之幾何遽長掩於元室痛幽明之負隔莫有酬夫  
舊德列觴豆以告哀尚愀焉而來格嗚呼哀哉尚饗

祭方壽父先生文

維至正十二年歲次壬辰十月辛丑朔越十九日己未



近故北村先生方公歸葬北山里生某等設幃道左薄  
陳香幣之奠為文以告之曰

人之有生具剛柔之理稟正通之氣雖所遇有窮達之  
殊然所就無彼此之異故其見之於行者或不能以少  
伸而其託之於言者則庶乎其可恃言之精者為詩發  
乎情而止乎禮義顧時世之迭更遭風變而雅廢苟有  
道以為之本根則出其緒餘亦皆不以盛衰而二致先  
生於斯可謂有志是以雖當巢傾雛覆之餘索倒囊垂

之際借鷓鴣之一枝曾風雨之不蔽然猶以貧自娛以閒自肆方策竹以為筇或紉蘭而作佩訪虞帝於蒼梧弔屈子於湘水計足跡之所經匪山巔則水瀉故凡草木之英華魚蟲之狀類莫不窮搜徧攬以為朝吟夕唱之具所以篇章之雜沓壹是翰墨之游戲或託物以寫懷或緣情而抒思或登高以詠古或望遠而諷世但此情之有適曾不恤夫室之空而躬之瘁迨黷宮之借師遂有來夫戶屨以其得諸已者淑諸人亦既有以慰憚

其心意信鄉社之長城實斯文之徽幟暨晚年之放曠  
稍沉酣乎酒醴挾麴生以與俱卧匏樽而徑醉較劉伶  
與李白又何異乎伯仲之與翁李惟仙華之故墟誠衆  
芳之所萃當先公隱居行義於是中而括蒼有吳延平  
有謝亦翻然而來涖人之望之要不翅夫呂氏之友朱  
張方參居而鼎峙當是之時其媚學之徒惟蜀山為可  
仰他若田居子之清醇深裊君之精邃亦皆可挹而可  
厲先生之於三公咸弟撫而兄事庶幾大雅之風永振

巖南之里豈期人事之難常洊若晨星之飄墜幸靈光之獨立尚差莪於風雨里黨以之而壯觀山川以之而輝媚竟斯人之不淑亦塵飛而烟委嗚呼繼今以往典刑日以曠遠鄉學日以陵替閭巷何從而考徵士子何從而淬礪將見黃鐘大呂之音自是而不續而濮上桑間且交陳而並舉某等之於先生或以姻親而託交或以鄉扮而叨契或以弟子而游從或以友朋而密邇咸資晉鄙之薰得免君子之棄夫何鄰燭之輝不照泣麟

之淚當靈車之既駕痛哲人之云逝託雞絮以陳誠尚  
啾馬而鑿視尚饗

墳記

志樓楨殯記

嗚呼是惟樓楨之殯楨於予為姻家子予往時僑寄邑  
下居相邇也每見楨在羣兒中眉目清揚進趨閑整心  
異之既而楨有祖父之喪予往弔其家復見楨衰經中  
呱呱涕洟若嘗習於禮者用是益竒之其後楨家寢衰

橫逆蠶起楨繫然無依予亦挈挈道路不得日與楨接  
歲時問一見楨楨則泣而言曰吾祖父不幸俱歿不令  
子實遭多難萬一不能自支將無以見先人於地下矣  
予至是則又未嘗不壯其為人一日楨果以狀聞於縣  
慨然欲再植其家久之其橫逆由是也楨復訴之大府  
大府頗疑其事楨乃悲啼恐粟為兒恒狀大府官憐之  
因得具陳所訴大府方欲為之究治其寃而楨已死其  
可哀也夫嗚呼予於樓氏嘗接其祖子孫三世矣始觀

楨之祖父俱亡固已竊為樓氏憂及見楨之能自樹立  
以禦強侮又未始不為樓氏慶今又聞楨之死則樓氏  
之憂未有艾也俯仰十餘年間觀其家之盛衰而置喜  
戚於其間者已變更之若是則凡斯世之人欲藉其子  
孫之久保其家而不墜者皆可悲也寧獨樓氏哉樓氏  
世居婺之浦江有諱某者於楨為四世祖嘗受業東萊  
呂氏之門人祖諱某父諱偲母趙氏生於某年某月某  
日距卒時得春秋十有四至正二年七月某日卒之日

也卒後之某月某日其母殯其柩於某原且使請文於予予年長於楨而分高於楨視楨猶子也故為文以志其殯

陳府教壙記

代孤子

先君諱士貞字彥正姓陳氏婺之浦江人曾大父諱文煥通春秋穀梁學嘗以登仕郎自試入官會宋亡不仕杜門著書有春秋質疑傳學者大父諱德潤父諱遠大入國朝以材自效仕至承事郎温州路平陽州判官妣



黃氏繼林氏先君林出也生於大德六年壬寅十月辛酉卒於至正六年丙戌六月丁巳得年四十有五初娶凌氏先卒再娶王氏俱無子倫以從子為之後王有女一人曰佶適翰林待制柳公之孫穎先君卒後之六年某月某日乃克葬於興賢鄉之嚴家塢從治命也先君自幼知讀書記誦日數千言及長欲以明經決科從鄉先生深裊吳公遊習春秋以襲家學居久之有司使試藝鄉闈一不中輒束書而歸終身不再踐場屋初巴西

鄧公在翰林聞先君之學行與同列薦諸朝事下江浙  
行中書初授衢州路清獻書院山長以疾弗果上改授  
處州路石門書院山長在官未期月丁內艱再長建德  
之釣臺衢之柯山二書院乃以累考序遷龍興路富州  
儒學教授先君慨然思奮拔以自見命下即趣裝上道  
俄而疾作竟卒於婺城之寓舍痛哉天乎先君事親謹  
甚太夫人年踰七十沉痾久弗瘳先君晝夜驚疑扶持  
保抱若嬰孺然人皆以為孝在童冠時嘗從鷲鳥以搏

孰自娛大父聞之頗不懌先君深自悔曰作禽荒以貽  
父憂不可即盡收撲死之其速於遷善人亦以為難先  
君端重韜默介潔有常不能脂韋與世俗俯仰而於交  
際之禮惟謹處家以和待下以寬雖臧獲有過絕不以  
聲色加之平居精勤強力酬答少閒則挾冊不置故於  
書多所玩繹至於陰陽卜筮巫醫方伎神仙道家之言  
靡不畢究為詩文深沉醲郁見推儕輩晚乃不欲溺志  
俗學尤以存心養性為務扁所居齋曰儼若思蓋以自

見也不肖孤茹苦銜毒言不成辭姑序次梗概納之幽宮其詳則俟立言者銘馬孤子倫泣血謹記

先府君墳記

嗚呼我先君諱暄字景和姓戴氏婺之浦江人曾祖諱珙祖諱錫父諱濤妣陳氏先君器度凝懋恂恂寡言遇事恒多恩有寬厚長者行尤竭心孝友處天倫中事有極難而先君卒能全其和君子稱之謂不讓古人壽年六十有七不幸以至正庚寅歲九月辛酉卒家逾月丁

酉葬興賢鄉嘉樹塢之原娶諸暨劉氏先十三年卒墓  
同穴子男三長森亦先卒次良次元女一適趙良本孫  
男六孫女二曾孫男一嗚呼以我先君之德之懿奈何  
竟止於斯耶良俯伏草土未能求銘以登載盛美謹鏡  
誌石納於墳中嗚呼蒼天父兮何在孤哀子良泣血記

九靈山房集卷七

欽定四庫全書

九靈山房集卷八

元 戴良 撰

吳遊稿第一

四言詩

山有杞 并序

山有杞為董生彥符作也生侍其父正齋公官吳中見吳中山水之勝念父之不能以遊息也為作圖以娛之

山有杞于吳之里君子至止可以宴喜水有魚于吳之  
墟君子止居可以宴胥于山于水有軒撫撫何斯違斯  
莫或違處于水于山有亭閑閑何斯違斯莫或違安安  
其可懷耄將至矣今也不樂歲月逝矣爰作斯圖式歌  
且謠願言公退惟以逍遙其樂也哉

趙母詩

汎彼苔水可漱可濯閨門有閑樂爾貞淑汎彼苔水可  
泳可游閨門有肅樂爾貞幽于彼苔矣其流瀾瀾樂爾



貞幽今其逝矣翼翼孝鳥息我庭柯反哺無從傷如之  
何翼翼孝鳥晨集于林顧儔相鳴實感我心

五言古詩

別鶴操

仙禽胎化初振迅東海間異質清以曠明心迥而閒排  
徊騁天步逼仄隘人寰夕飲慕瑤池朝翔想芝田顧逐  
華亭侶來乘衛國軒丹羅既掩翳青繳亦羈纏俛首時  
獨思對影恒自憐飛羣徒在望驚孤那得還王鳩知候

晦旅雁識天寒人不處睽離何能喻吾言

賤生

中經閱真訣內策昧遐討受命歎蒲姿養生疑桂腦衰  
歷已從華愁容亦收藻空慚皇覽揆敢擬彭年老僚友  
歛鱗集杯盤娛潦倒酣醉及中觴感悅亂雙抱坐當晝  
景移起矚時物好簾前花受風階際露停草無情固難  
恃有生亦誰保得酒且歡酌萬事付元造

歎年

運行歸有窮餘生會當幾恍忽度華年蕭條臨暮齒棄  
繻慚英妙遊談愧名理偶叨末路慶復覩東都禮藩國  
揖文雅鳳池接冠履顧嫌恩私被莫稱駢服美忝竊旅  
孤蹤憂歡將二祀浮榮空此時芳辰竟何許齊景悲牛  
山宣尼歎逝水此身誰不賫長意自無已屑玉昧瑤淵  
斷藥乏松髓吾其翦衆念且酌穆生醴

孤女別主辭

沈仲悅以百金得美妾既而知其  
有父憂也即館諸別室後為具資

裝嫁之比嫁  
時猶處女也

賤妾奉君日父死方未期妾心自為鄙安知高士懷高  
士重明義豈昧居室時深閨朝暮入不肯一回窺君德  
海之大妾身水之微大德固不虧微身將何依水萍已  
無定兔絲賴有施遂伸皎日誓永絕行露疑百金諒非  
重獨行誠所稀在君迺其常于妾良不貲綿綿感嘉惠  
遲遲出門基願為雙飛燕猶及傍君幃

周伯溫侍御席上賦

浙浙扇晨飈塗塗散暝霏翳翳繁陰結淒淒陽卉腓開

冬感祖物高會洽音徽嘉肴薦文鯉芳醕獻蘭卮列坐  
侍星弁駢筵遙緋帷綺席全當牖朱簾半隱扉已耐亭  
上酌復玩軒中奇美話既愉心麗句更流思清事古難  
偶歡合情所希及今不為樂後茲將待誰但乏瓊玖報  
虛蒙桃李施惟祝養生年黃髮以為期

長洲苑送人

聖澤竭周京伯功侈吳甸館娃既有宮長洲復名苑奇  
葩由化造異羽自神選娛樂纏睿思盤遊注英眄託乘

色斯升觸輪賢已遠治亂良未尋興亡竟誰辨蹉跎世  
運移悽惻海田變君子屬于役舉觴此追餞行矣臨長  
途悵焉罷歡宴何當即旋駕名邦重遊衍

劍池送人

祖龍南狩年拔劍當風立慷慨逞雄心斫石為入耿  
耿秋水光稜稜鐵花澁殺氣纏蛟螭腥痕凜原隰參差  
世祀移寂寞威風戢要離去不顧湛盧見之泣英圖悵  
若茲餘波眇誰挹茂宰歛騫騰軍容何翕習仗劍戍三

邊斬首當幾級  
惟國養甲兵  
有愾須討襲  
相期獻凱歸  
此地共栖集

遊湖上諸山

澄湖總地德連山  
雄寓縣嵐氣川上浮  
林影波中見東  
臨帶吳會北拒襟  
楚甸上峙岫如復  
下亘水成練參差  
窺粉堞出沒見丹  
殿宏麗邁前聞遊  
觀踰昔踐君侯挺  
奇興軒蓋此追衍  
雲隨朱旆揚路繞  
蘋霞轉五藥芳可  
采三芝秀堪攀升  
高望已騁即早趣  
仍展願言謝羈纏

久茲事攀援結網政未能臨淵亦徒羨

登堯峰

已從頡泉遊復向堯峰去堯峰眇何所  
眇俗不知處披拂強追尋疲恭窘凌遽  
息喘倚茂松濟勝犯零露積石擁近蹊  
飛嵐護遙樹仰觀天宇垂俯睨河流注  
石湖尚波瀾洞庭但烟霧遊子多悲懷  
觸景增遠慕微跡既漂泊流年復遲暮  
半生僅一來百齡能幾度回駕悵難淹  
又復首前路



同楊文舉提學遊虎邱

疲榮厭府寺思閒愛林邱  
今晨偶從告薄言為茲遊興  
馬出城郭冠蓋集朋儔  
尋雲共陟峴吟風同倚樓  
池浸劍光冷石拱講臺幽  
邱虎餘昔勢慙泉溢前流  
逝聽已咸踐新賞復旁搜  
樹杪吳岫出天末楚雲浮  
睇迥距遙甸臨卑撫平疇  
萬象固如昨六龍寧暫留  
且茲酌芳醴相從滌繁憂  
豈不念行役天道良悠悠

陪陳夷白左司省先隴遂遊西山諸寺

孝理昭令典哀敬著前經方冬謹封樹肅命省邱塋侵  
晨發西郭平旦越修垵飛蓋上坡陀憑軾仰光靈白楊  
何蕭蕭悲松復泠泠以茲霜露降益起悽愴情本深未  
斯茂源濬流愈清叔氏既尊盛伯氏亦光榮祿厚養不  
逮寵極坐自驚感深去復留心惕久迺寧尋徑稍出陸  
移舟更穿汀林寒霜雪白寺古莓苔青循廊阻昏黑失  
路屢顛傾怯風坐深閣戀月開疎櫺含思及明發鼓勇  
復前行緬泉裂地湧堯峰矗天橫拍欄睨寒井尋山窮

絕陘躑躅東林莫徘徊西月升將命晚戒道急時暗催  
舫船居類坐甑蓬宿訝拘圉防流暫宵閉戒暴城夜扁  
更闌占漏密家近驗舟停芳晨已罕遇良會亦難并况  
茲同遊侶一皆間世英或為鳳薄霄或作鴻入冥或分  
庭竹潤或奪春蘭馨獨余事漂泊顧影久伶俜豈期當  
末路亦此託前旌忝竊雖過任感荷實所盟願言日追  
從放浪終百齡

次韻蔡經歷病中述懷

平旦起趨府日晏未遑食羣言方究萬紛務諒非一進  
豈無云補退猶持夕惕仰窺令圖廣俯察道言密得喪  
事既知治亂情亦識遭時匪過任撫已恒自失玩辭戒  
負乘觀器忌傾側孜孜竭勞勤役役忘宴息在疚尚懷  
憂從告詎思佚琴言澁未和吏案浩已積迂騎應久僎  
來客復如織晨出愧蓬心晚沐感霜色乃薄干祿情欲  
弛荷擔力執戟固已疲草諫亦多疾萬事莫並歡重負  
寧遽釋不見戾天羽林木已難擇

寄陳伯將學士

構厦必衆材成裘必羣腋自非合才彥何能定家國若  
人蘊嘉猷生世值明德鳳池因託身龍淵尋矯迹載建  
家王禮復覩漢朝則清芬播方來惠心邁疇昔夜直躡  
天階晨趨媚蘭室密謀已究萬妍論信非一吾徒方倚  
賴微軀荷蘇息無言腹背羽永愧排空翼

寄陳太守

迅足羨奔影羈羽忌離聲明暗既異姿判止亦殊形若

人東州彥生世昌運并軍帳早嘗入省幙晚所經一朝  
剖符竹千里治專城飛蓋出南郭肅駕騫修垆側聽江  
風響俯睨湖光明去意不可淹行旆安得停顧已正維  
繫臨衢逾屏營賓朋徒滿眼何以慰吾情

吳中追哭胡古愚博士

少小媚桑梓薄晚遠粉榆因念平生友長慟千里途伊  
人富才彥清聲播中區翰逸唐晉間文超秦漢初董筆  
照往典孔鐸振今衢上國羽儀盛曲臺恩禮殊朋情日

夜密徽音歲時疎以茲隔幽明况迺違里閭竊祿逐雲  
旅載筆預人徒搗辭空有屬搗管若為書

對雨金達可送酒至

星躔離夜月桂渚發朝雷族雲起泉室零雨下陽臺飄  
檐方似霧集地復如埃空濛迷野鶩霑灑滑階苔旅人  
乏愉悅孤館獨徘徊久缺清醑至忽值白衣來豈不欲  
為酌因君停玉杯

徐叔度遺紈扇

欽定四庫全書

九靈山房集

團團七華扇名在制久缺感君裂紈素與蒙却煩暘入  
手訝如珪映容疑學月玩之炎氣消握之微風發却願  
暑長在無使君暫歇

蔡郎中使還

嚴車辭楚壤飛榜涉淮河畢使遂還心延瞰起悲歌蕭  
瑟涼海風洶湧大江波登艫遲來雨蕩槳及歸霞相公  
征不庭威命被四遐萬騎若雲集千旌亦星羅士馬固  
溢肥境土猶犬牙帷幙有深謀君子在所荷樽前可折



衝堂上有干戈中營方倚注正遠將如何

偶書

皇元邁迤邐海宇咸震蕩兵戈綿歲月骸骨纏草莽魑  
魅在野號蒿萊沒衢長上宰奉王靈按劍赴楚壤水涉  
艤萬艘陸出車千兩一舉清大憝載舉走姦黨芍陂既  
昭潔合肥亦澄朗肅肅整歸途翩翩蕩迴槳昔邁歎涂  
艱今來樂河廣惟茲盛勛業一由進忠謹鞠躬軍帳中  
指顧將臺上制勝獲先鳴收功膺上賞吉甫六月征公

旦東山往愧無風雅音長歌繼絕響

病中承達可送小木椅

木質本堅勁雕刻乃有施屈體奉時好鞠躬承宴疲戀  
月載三坐怯風四五移但願丹心在不使素塵縞

秋菊圖贈別

有美當階菊秋萼何離離逢君掖垣宴摘以奉金卮玉  
指遺故香朱唇含昔姿無言勸醕餘根株長別離

次韻宿西山

旦權東湖溢暝策西山麓林光漏月清水影漾天綠初  
風草故和窮律轉新肅悲來攢人懷山房不成宿

送陳同知

楚客事晉君已皆榮厚祿身章襲犀象鼎食飫梁肉荀  
范作姻婭趙魏與追逐旦分馳道出夜旁天居宿故悲  
絕宗黨新敬起賓僕東洲有儒生官路獨迷躅青年結  
主知窮老佐州牧今為千里行猶未分符竹

周侍御家賞梅

託根向南苑發萼當北枝逢君後園宴折以慰佳期遠  
近非一香參差多異姿餘榮未渠已晚實方見奇要知  
調鼎日復此奉金卮

祭托克托丞相祠

濯七苾椒醑充庭潔薌骨禮為明祀用功由報事昭升  
朝後公叔逮事愧王寮祠使偶陪厠福飲遂招邀憩水  
既駢筵貪山亦停橈徘徊媚良集放浪愛清朝英英雲  
度林泣泣露棲條暄風蕩鱗羽淑景麗江臯神祐溢瞻

聽民思播謠冠蓋歛聚散園塋轉岑堯登城騁回望  
遺業相與高感歎遂成章聊用布同袍

題李道士鶴瓢

羽人解騰翥託物示靈竒遂使園瓢種亦幻仙禽姿長  
喙已忘啄輕軀時欲飛投贈有深意世人那得知

題陳敬初小丹邱

遙途念鄉縣晚志重仙靈結構避公館卧遊資赤城瀾  
漫泉湧渠合沓雲翼櫺峭崿天末起飛流戶外清山川

隔舊賞庭院暢新情靜有幽事悅動無塵慮紫何必踐  
台嶽茲道可長生

題梅花莊

離離莊上梅粲粲獨言奇橫窓低可折雜霰遠難窺光  
翻却月觀影亂合冰池長違一枝使竟歸三實詩芳歲  
固云暮高標寧遽移但恐草木心區區君不知

奉陪省院諸公小集

淵襟眷儒雅藩國盛名流鳳池早嘗集虎衛晚仍留禮

燕及時暇昌會因澤周顧余陪鼎食復此薦民謳世慶  
共汪溢身願兩綢繆所愧凡濁資謬從仙珮遊

以紈扇遺人題其上

我家白紈扇巧製出孫枝殷勤奉玉手與君却煩熇提  
攜微風起出入明月隨所恨秋節至君恩不可追

治圃四首

三春豐雨澤晨興觀我畦嘉蔬有餘滋草盛相與齊  
戮力治荒穢指景光已西好月因時來歸路杳然迷暮鳥

尋舊林晚獸遵故蹊我亦息微勞去去安吾棲

長夏罕人事齋居有餘閒北窗多悴物且遂灌吾園攢  
根既舒達積葉亦蔥半瓜瓞繞畦長新葵應節鮮抱甕  
一回視生意盈化先在我豈不勞即境多所歡悠悠千  
載間樊生信為賢

苒苒素秋節淒淒天宇清挈杖視西園俛仰傷我情藜  
藿日就凋惟見野草青草青亦幾日霜露早已零萬物  
會有終人生無久榮功勛苟不建未若託林垆所以荷



黃翁長歌悲磬聲吾其理吾圃聊以隱自名

窮冬霜露下谷風轉淒其以今四連周感茲百卉腓披  
榛歸北園墟里故依依桑竹餘朽株臺榭有遺基野老  
相與至嘲諧談昔時談罷輒引觴陶然無所思紛紜世  
中事寒暑相盛衰此理苟不勝役役徒爾為既以適吾  
願何能忽去茲

次韻夜直

公署近霄漢時夏暑不侵金鑿殊隱隱玉漏正沉沉官

燭明綺座夕香散瑶林揆已知為忝憮然愧華簪

泛石湖

束髮企名都遊宦及茲年遂陪登瀛侶來上汎湖船水  
光曜殘日林影溢中天巖穴傳橈見樓臺鼓柁看蒼蒼  
斂暝色暮暮曳寒烟菰蒲有餘淒鷗鷺相與閒窈窕趨  
迴浦蕩漾媚遙川水宿怯宵清篷卧愛月穿俯視潛夜  
魚仰睇衝曉鳶窘身愧浮霄斂志慚躍淵何當謝冠履  
歲晏此盤旋

登靈巖

茲山信奇峭屹立與雲齊  
高閣枕危峰古寺俯回溪  
太湖襟左右洞庭亘東西

闕

披拂凌丹梯鳴琴

忘故臺採香感新蹊  
眇眇驚麇竄唧唧飢鼯啼  
昔也宮娃駐今茲山鬼棲  
弔往固傷惻念來亦悲悽  
盤遊古垂戒此道願無睽

宿龍山

旦發石湖曲晚過龍山陞  
遙峰銜暝日寒谷斂晴霏  
緣

源殊未極即陸淡忘歸既投孤館息遂悞君侯知談諧  
獲心醉觴詠使情依平生仰高風此夜挹清徽因之念  
所思如何獨愆期泉石余方玩疾痰君自縻安得同攜  
手眷言此棲遲

上天池

良遊思已愜勝地喜仍踐筍輿穿竹行雲路盤空轉蓮  
峯見萃律天池覩清淺石奇斜匝林徑古曲藏蘚躑躅  
日已晏沾灑露猶泣回駕諒難淹逸趣歎莫展理亂良

未形得喪竟誰辨寄言同懷客且茲息疲蹇

夜泊吳江長橋宿垂虹亭

閃閃練月宵稜稜素秋節舍棹上孤亭臨江候歸客佳  
人殊未來幽意為誰適徘徊當夜半髣髴去天尺仰接  
銀河橫俯照星緯逼直疑穹壤連豈有人世隔飄飄形  
若蛻眇眇思何極居然怯風露聊復就衾席亦既不成  
寐將何慰茲夕賴有同心人連牀話疇昔

宜興張德機避兵吳門

避亂去鄉族十載未旋歸亦知事必是何意身見之風  
雨交橫來波濤無已時人各念棲息胡為淹在茲目厭  
長途阻心懷故里思義興不可望一望使人悲治亂良  
未形聚散焉可期請君翦舊念一任合與離不見門衢  
外歲歲轉蓬飛

送趙推官赴市舶提舉

離亭漾水寒別幌耀霜白是時息行旅念子赴長陌郡  
政罷刑書闕譏典商舶逸駕已難追况勉康衢力

送讓師還中竺

世方疲戰爭師獨樂閒靜稍臨鶴市途復憶虎林境緣  
源睇雲壑憩樹悅烟嶺身名已俱遣况乃塵事屏

題貞壽堂二首

青青澗畔松歲晏發華滋衆芳日已悴風霜何獨宜祇  
緣一氣貞何處有榮衰人於萬物中寧復不如斯惟堅  
歲寒節乃異春花飛所以楊令母高堂壽期頤

吳門盡西垂中有楊母堂龍煤鋪作榜嘉名偉煌煌亦

既榮祿養婆娑壽而康問胡能致之惟貞神所相是行  
一不然萬事易乃常不廢眉壽詩却詠棘心章

始發吳門

冠裳坐自束窘此文墨職終朝事馳翰日晏不遑食及  
茲將使命翩然就行役忽見江中水鷗鳥弄羣翼款款  
身既閒悠悠意何適便欲尋舊盟同遊復同息

雨夜泊秀州城下憶僚友作

晨風變淑景春霞啟陰期雲根結翳翳雨足散垂垂鄙



人獨言邁去棹不得維路無行輪聲岸有荒楚滋暮抵  
秀城下夜泊河水湄遊魚返深渚啼鷓起重基客途玩  
物理寧不戀所思

至杭宿錢塘驛

昨夜宿臨平今旦入錢塘明岑淨朝氣迴浦漾晨光隱  
隱吳岫出遙遙越岸長稜稜見槁堞戢戢覩攢牆堪歎  
遊歌地都非佳麗場樓臺已闌寂闌亦荒涼平生味  
陳力未暮忝為郎徒然感恩義誰復聽忠良晚投公館

宿官燭何燐煌自憐無補報飲愧繞中腸

登飛來峰

人言西山好茲峰更奇絕飛來自西裔悠悠彌年月使  
行偶經從息徒此沿越結欣涉迴澗澡慮探奇穴嵌崟  
去崖斷詭仄歸蹊缺梯苔晞膺原捫蘿瞰深樾可憐瑤  
圃境盡入兵火劫雲構歛已墟忍草亦衰歇吾聞西方  
教空色俱寂滅莊嚴適增累幻化匪虛說伊人信往矣  
對此空騷屑

泛西湖舟中作

夙負海嶽志，緬懷西湖名。蹉跎去元髮，邂逅徵素情。駟  
鞚依岸息，畫舫漾波輕。前睇蘇堤繞，旁窺葛嶺橫。戀結  
處士祠，悲纏忠將塋。繁賞屢失境，變魂愈驚雉。堞見  
新築，輦覺失舊營。空餘歌舞地，詎聞簫管聲。顧余文墨  
吏，遑知治亂情。人隱雖未弭，客懷聊暫清。一動羣生念，  
咄咄何時平。

遊吳山承天觀

石逕趨魏宮雲薨倚層壁昔聞帝子遊今見羽人宅鱗  
居庭際擁層閣窗外闢複嶺曲且盤喬林隱復直路縈  
賞心侶谷館咀芝客即近已欣覲撫遠亦驚覲離離越  
樹青渺渺海門白乘風遲來潮倚月候歸汐徘徊憶天  
險俯仰詩地德于時將指使暫此盪塵臆豈無犬馬情  
終負烟霞癖何當解朝組相從隱仙籍

抵富陽宿縣治作

戾戾風蕩波鱗鱗雲出岬乘輶臨安道指景富春郭是

節春已暮遙途寒尚薄升陽對人掩傾潤灑衣落解鞍  
憩危嶺倚劍望幽壑飢禽聲固慘哮虎勢尤惡既暝入  
公署息念坐塵閣俯思還浦魚仰憶迴風鶴以之念鄉  
縣臨觴不能酌

入湖源

榜舟渡長浦搔首望遙山西界出吳道東臨入越關到  
家諒匪遠跋馬勢不前懷祿吾豈敢行路古所難獨有  
山上雲既出復知還

次場口

久宦迷故都故都在何處驅車向鄰壤頭白不知路長  
林日夕行曠野東西顧方遠歎途阻逾近覆心懼豈無  
入林翻莫與歸颺遇


至古城飲馮氏家

跋馬向斯里髣髴見鄉閭徒知故山近終嫌歸路斷移  
疾駐近郊薄言息短翰新知固雲集舊交多雨散惟君  
好兄弟視我實親串慷慨談昔遊留連興累歎荒基記

歌榭棄礎憶吟館不覩物興衰詎知時治亂鄙人獲良  
晤是節牽薄宦清卮阻久陪別袂恨長判作詩寫情慮  
聊用慰憂患

望九靈山

九靈眇何許連峯高不極依稀接遠霧仿佛起寒色我  
家是山下別來歲頻易屋廬閒鳥聲冢墓遺獸跡可望  
不可至空多故鄉憶



九靈山房集卷八



欽定四庫全書

集部

九靈山房集卷九

十

詳校官檢討臣德生

中書臣劉源溥覆勘

總校官庶吉士臣倉聖脉

校對官主簿臣汪日贊

謄錄貢生臣李玉璿

欽定四庫全書

九靈山房集卷九

元 戴良 撰

吳遊稿第二

五言古詩

贈婦

單居易為久，低別難處心。而況我佳儷，有若比翼禽。暮  
棲必並枝，朝啄常共林。中道一分散，曠世絕形音。跂彼  
雙睢鳩，翻飛河之濶。徘徊逐儔侶，每與同浮沉。今我反

不如迢迢江與岑可能施兩翮乘風起相尋

婦答

妾昔舍閭里從君此西征為君是妾夫終遠父與兄豈  
知末路來與君亦分形茫茫畏途上惟攜一豎嬰妾固  
知戀君君亦有妾情遊宦偶無終聊各趣所營願勿以  
妾故沉憂損君生君軀泰山重詎比妾身輕

傷李氏妾二首

李乃圖嚙默色治書之女有女  
德年十九歸吾為妾未幾即死

因賦此  
傷之

皎皎彼妹子粲粲美容華鮮肌映朝日惠質鬪晴葩借  
問何從來生自公侯家一為箕帚妾歛已絕矜誇居處  
辭曩貴食飲避前奢奈何九秋霜竟殞三春花時時想  
爾形撫膺歎以嗟

涼風撼房闈朗月照簾櫳佳人已冥冥髣髴覩爾容入  
室撫遺跡茵在牀竟空海濶無回波葉落豈留蓬茫茫  
百年內私懷誰克從

泛海

仲夏發會稽乍秋別句章擬杭黑水海首渡青龍洋南  
條山已斷北界水何長遠近浪為國周圍天作疆川后  
偶安恬天吳亦屏藏蕩槩乘月疾挂席逐風揚零露拂  
蟠木旭日耀扶桑我行無休隙此去何渺茫東海蹈仲  
連西溟遁伯陽輕名冀道勝重已企時康孰謂情可陳  
旅念坐自傷

渡黑水洋

舟行五宵旦黑水乃始渡重險詎可言忘生此其處紫

氛蒸作雲玄浪蹙為霧柁底即龍躍擄前復鯨怒掀然  
大波起歛與危檣遇入水訪馮夷去此特跬步舟子盡  
號泣老篙亦悲訴呼天天不聞委命命何據川后幸戢  
威風伯并收馭偶濟固云喜既往益增懼居常樂夷曠  
蹈險憂覆墜出處愧宿心禍福昧前慮皎皎乘桴訓持  
用慰情素

望大牢山

稍入東膠界即見大牢山峯攢倅劍戟嶂疊類雲烟稜

稜插巨海渺渺漾中川波濤共突兀天日相澄鮮氓居  
接島嶼觀宇連術阡既館茹芝士亦巢遁世賢客行積  
昏旦水宿倦舟船茲山思獨往結茅徵願言柁師不我  
從太息歸中原

抵膠州

舟行無休期晨夜涉風水蹈越歷吳鄉乘楚造齊鄙逗  
浦波尚險即陸路纔砥依稀見州郭倉皇問官邸土墻  
訝半頽草屋驚全圯所幸民俗淳稍使客情喜北來既

旬月西去尚幾里嚴程謂已近危途方始此沮洳浩茫  
茫菅茅複靡靡幽燕去魂斷伊洛望心死日暮坐空牀  
浩然念粉梓

宿高密

長途跋且涉征車馳復息曉旦發東膠落景次高密城  
居不幾戶驛舍僅容膝僕馬立空曠徒侶話曛黑客情  
既牢落世議復紛惑前險雖幸過後艱方未測骨肉在  
遠道親朋皆異域縱云當別家胡乃輕去國明朝望鄉



處嗚咽淚沾臆

過營邱

營邱古齊國綿歷幾千春軌路偶經從延瞰一悲辛郭  
郭盡阡陌濠隍半烟雲旦搖禾黍實暮走狐兔羣陵遲  
世祀忽變換民居新廟寢想餘基文物憶前人在昔商  
政熄於時周德聞聖賢相濟會文武共經綸太公扶大  
業伯夷守其仁首陽遺節義東海爵功勳功勳誰獨久  
節義兩同湮物理有感觸長歎迴吾輪

至昌樂

秣馬安邱邑弭節昌樂縣道路正搔首郡邑忽馳箭邯  
河已虎據穆陵復豺戰西拒擁戈矛南出張組練倉茫  
走黎庶錯愕動纓弁我行日已遠我力日已倦亨衢冀  
栖息異事駭聞見如何命不淑所至時輒亂既同喪家  
狗亦類焚巢燕僕御心盡灰妻孥淚如霰我道苟如此  
安得髮不變

次益都

我行何處所北海乃其地去家萬里餘為客九秋際白  
楊夾軌路黃茅結官第陸嫌泥活活水愁河瀾瀾逐冠  
騎宵馳防敵城晝閉疲眊已星散驚塵仍霧起長嘯指  
牛山掩泣望溜水進退兩難圖徘徊尚誰恃易戒觸藩  
羝詩刺離孳雉已矣可奈何愁來但甘寐

七言古詩

題劉凝之騎牛圖

日落未落西山前誰家老翁牛背眠短身曲局聳兩肩

山花插帽帽為偏左手拊牛右捉鞭牛行不動穩若船  
一童衝冷手握拳迎風鼓勢走欲先荒郊冪冪草纖纖  
云是匡廬古道邊匡廬山水好盤旋此日劉公初挂冠  
劉公作令天聖間民物熙熙德化宣世上浮榮直幾錢  
白髮東歸耕石田當時出處亦偶然乃留遺迹後人看  
長安城中足豪賢車騎駢羅氣灼天一朝變滅如雲烟  
姓氏寥寥若箇傳我觀劉公差獨賢

題平章公所藏天馬圖

君不見余吾水中天馬出赤鬣縞身朱兩翼割玉為鞍  
鞵不得錦衣使者捷若飛紫韁金勒看君騎却憶拂林  
初獻時鳳城五門平旦啟馳道行驕轡耳耳路旁見者  
誰不喜衆中牽出朝未央揮霧流沫滿道香毛帶恩波  
眩日光龍眠老子識馬意行過天閑重回視白筆描成  
落人世我公購之灤水濱百金市畫翼得真奔霄追電  
何足云從今吹笛大軍起料知一日行千里

次韻徐益岳除夕行

闔閭城中宿歲時千家萬家新祭祠炮羔烹豕設厨供  
擊鐘列鼎宴賓墀高風獨羨蔡諮議五陵豪士不肯視  
餽餘也復餉比鄰席上盡皆瑚璉器主人揖客氣如虹  
手搗天巧天無功即同魏子歌蜡節復與薛生吟歲窮  
就中更羨徐季海越州之英有渠在忽然示我除夕行  
一座驚看毛髮改主人愛詩兼愛酒老我對之顏獨厚  
交遊栩栩滿樽前姓字寥寥落人後一年三百六十朝  
欲盡未盡只今宵無功可徵青史錄何法能救朱顏凋

行年五十纔欠二縱到百齡能有幾何須富貴勢薰天  
何須辛苦慕長年但願主翁酒常好時來取醉酒中老

次韻春雪禁體

孫生讀書光映簷楊公滌筆色搖盃豈知今日物象新  
總向三春堆積滿著地都將委瑣藏拂地盡把瑕疵澣  
直愁芝菌埋沒平詎惜松篁摧挫短雜梅既無北使折  
穿楊那有東風管干遠曉滑乍羞明萬瓦夜寒仍待伴  
村村掩土蟄迷戶處處壓林巢覆卵集遲固為入坎深

消早豈緣侵座暖世事已如鴻印爪我生方類鹿行曠  
卧廬正慕焦寢安掃徑却嗟衰路斷何人無事杖堪尋  
誰家有酒門可款皓首書生自局束紫髯參軍每蕭散  
方晨致命許降臨未午催詩戒遲緩徐君可是常勝家  
白戰先陳漢庭袒陽春一曲古難和凍筆閣來敢辭嬾

湖州行送人作郡

湖州歲歲修城堡敵騎時燒城外草城外居民如野鹿  
目睽睽兮尾促促去輸官稅輸不足半在軍中半在獄



獨留新婦餉姑前也執吳綃供稅錢吳綃已盡歸未得  
復到官家候消息我相聞之憂爾湖命選賢侯此剖符  
賢侯若為湖作主便須罷却徵求苦留得湖民障茲土

豕圖行

朔風吹沙黃入天代馬奔騰西出關邊頭人民格鬪死  
路旁突出惟孤豕羣騎蹀躞逐豕逃彎弓奮戟意氣豪  
一人自足當豕力衆騎盤旋追不得當時豈為一豕謀  
只恐功成恩寵休豈知此豕命既脫荐食郊原竟難遏

秋來草黃馬正肥將軍處處事驅馳何時射豕得豕歸  
嗚呼何時射豕得豕歸

賦廉范五袴送馬太守

成都婦何太苦官家火禁猛如虎夜長不得秉機杼就  
中小姊最堪憐箔蠶已老雪團團欲繅新繭為匹帛有  
燭當窗不敢燃廉生字民識民意來把成都火禁弛千  
家萬家夜燈起機聲軋軋滿城市成都婦笑開軒還引  
老姑齊拜天從今姑婦可安作迴晝為宵亦不眠廉生

廉生來何暮里巷至今傳五袴五袴傳來休重歌馬公  
為政勝廉多馬公為政勝廉多一朝去兮奈若何

次韻白頭母

錢王城中白頭母自言身是征人婦征人十五二十時  
有力纔堪折蝨股一朝鼙鼓動地聞却憶戰場勲可樹  
彎弓拔劍走山東鐵騎奔騰相什伍壯士軍前不顧生  
賤妾城頭空獨語亦知力盡當解圍山海悠悠沒歸路  
自從棄背今幾時門巷蕭條雪滿蹊破衣露肘釵半折

忍對故居成馬埒婦人老似鳩盤茶此日翻愁夫到家  
夫到家我顏那得新如花當初本自同苦樂只嫌身貴  
情亦奢白頭母涕如雨我亦悽然倚庭柱幾時斫得征  
馬蹄不載居人出門去

題蕭隱士卷

有鳥結巢東海湄正值海風初發時飄飄起向天漢飛  
引以羣雛挾以雌豈知天漢風亦悲迫逐更有鷓鴣窺  
禍機未動已心知中夜相失羣迺離既離復合誰實為

鄉關迢迢千里歸却羨舊林多好枝

故人子以早年中選喜而有賦

吳門九月秋氣滿  
析析西風吹葉斷  
忽傳一夜春信來  
千花萬花燈上開  
花開向君報君喜  
賢書曉到吳門裏  
羨君身著五采衣  
竟向文場戰勝歸  
君年今纔十有九  
能使香名滿人口  
祇緣育得毛骨奇  
長頭廣額豐兩頤  
雙眸奕奕復如電  
世人見之驚且歎  
人說驍駒產駿駒  
叱撥不生凡馬軀  
有士如君事非偶  
畢竟而翁積來厚

而翁當代稱才賢身懸紫綬色赭然居官不蹈紈袴習  
教子惟磨鐵硯穿莫怪君今致身早庭栽五桂應亦老  
須識朱衣暗點時好是而翁濟時了家澤如斯世所無  
生子只作蒼頭奴

五言律詩

送歸安丞

之子官何處湖流一舸通汀洲蘋影外城郭水光中夜  
泛苔溪月春吟箬下風若逢陳太守為報各哀翁

送趙司令

自入嫖姚幙從軍凡幾年却緣鹽筴利去讀海王篇  
蜃氣侵官舍鮫人迎渡船看君未年邁暫出莫悽然

除夜客中二首

忽忽歲欲暮飄飄歎此生孤舟遊子恨兩地老妻情  
數蹇頻思卜途窮懶問程遙知小兒女猶自說昇平

已就長途往堪憐暮景斜一年惟此夜千里更誰家  
戀國心空亦憂時髮已華此身如可乞只合老烟霞

歲暮留別二首

五十明朝過何從託此身不堪垂老日翻作負羈臣四  
海無知己長途惟見君明朝分別處草木為誰春

從宦不得意歲闌聊復歸親朋隨地有情誼似君稀舟  
小容分榻裘單許借衣平生歲寒意臨別重依依

自定川入海

乍離東海郡又上北溟船紅見波中日青窺水際天鄉  
關千里隔身世一帆懸鄉信何從達歸鴻落照前



渡黑水洋

舟行滄海上，魂斷黑波前。  
好似星沉夜，仍逢雨至天。  
鯨迷川后國，龍觸估胡船。  
強起推篷看，惟應髮欠玄。

次大牢山下

草樹叢祠古，波濤仙掌清。  
鐘聲千里濶，帆影一舟橫。  
茅屋邊山戍，泥牆傍海城。  
中原風景異，到此暗傷情。

至膠州

自入東膠路，鄉邦此地賒。  
人悲西候日，帆亂北溟霞。  
民

俗農為業州城土作家驛樓何處是庭樹暮棲鴉

宿高密

客路信悠悠荒城許暫投黃塵齊地晚紅葉海邦秋燈  
影明官驛鐘聲度縣樓去家今幾許猶自夢東州

過營邱

山川無變易人事有消亡堪歎鷹揚地都為鹿卧場故  
基穿井邑衰草半濠隍屬有歸歎歎登臨倍感傷

寓昌樂

淮海來時路東西幾日程一年行萬里數口託孤城邯  
水方馳箭嶠函未罷兵餘年已無幾坐此欲何成

次益都

使傳來遙甸估車馳近垆茅廬城外市場樹驛邊亭溜  
水穿原綠牛山入郡青西遊應未遂又復渡滄溟

送班景道

鄉邦南北異姓字獨先知忽見還成別重逢總未期路  
分殘雨外馬度夕陽時莫動林居興轅門新拜師

七言律詩

送路理問出使太原

使君持節欲何之，好是中原酣戰時。  
天遠諸關淹歲月，雲纏殺氣傍旌旗。  
渭川浪急舟行速，秦樹陰深馬去遲。  
復命東藩還幾日，風霜看取鬢成絲。

次韻遊寶華寺

失脚江湖鬢欲華，尋僧姑啜趙州茶。  
卓泉不復聞飛錫，說法空傳見雨花。  
水樂隔林迷梵唄，雲衣入戶亂袈裟。

同遊賴有蘭臺客時出新詩鬪彩霞

次韻哀逝

豈期偕老到如今却掩深情此水尋傷逝已枯潘岳淚  
齊眉真負孟光心魂迷東海何時返迹閱西湖與恨深  
老我每多墳墓感一聞楚些浩難禁

次韻寄陳大叅

仙風久仰羽人邱功業今歸戶牖侯萬事糾紛難辟穀  
一秋衰謝獨登樓思閒已蠟遊山屐願治方資濟海舟

聞說中營頻倚注  
文園肺病幾時瘳

次韻憶張雲門

年來已草絕交書  
豈為青山不負吾  
自分迂踈非世用  
愧公才力應時須  
文多每憶相如病  
道勝兼疑子夏癯  
有客維舟同感念  
詩筒還復寄來無

次韻遊上方

故人邀我破愁顏  
風磴雲巖尚可攀  
五色蓬萊常近郭  
一湖波浪欲浮山  
江臯極目寒楓落  
澗道傷心細菊斑

作客異鄉俱老大乘時相賞不知還

次韻遊靈巖

白浪連天日下春杖藜此地躡層峰山從水上搖光碧  
樹向雲間結影重香徑晚風歸野衲琴臺暮色度疎鐘  
懷人憶事空惆悵登眺何曾得暫從

次韻謁范文正公祠

長憶當時將相門范公壯氣獨軒軒百年義膽聞強敵  
一片忠心奉至尊祠宇何年遺結構子孫易代自便蕃

白頭悵望空歸去垂裕誰人及後昆

次韻遊湖山

偶向西山傍鶴飛絕愁嵐氣襲人微道旁野樹飄花盡  
湖上陰雲作雨歸青瑣追趨恩獨厚赤松導引事多非  
求仙何似瀛洲好清切依然近紫薇

渡海

結屋雲林度半生老來翻向海中行驚看水色連天色  
厭聽風聲雜浪聲舟子夜喧疑島近佔人曉卜驗潮平



時危歸國渾無路敢憚波濤萬里程

黑水洋

涉海纔經五日期深洋一望黑淋漓波搖月夜人先見  
船過雨天龍未知險勝呂梁漂鷓處悲同巫峽泣猿時  
平生一段乘桴意莫為微軀到此疑

登大牢山

海上名山誰作鄰數峯高起自為羣林明夜見水底日  
浪動暮疑巖下雲渺渺乾坤何處辨迢迢齊楚此中分

那堪回首東南地烽火連年警報聞

至東膠

海上驚聞報曉雞人家只在水雲西  
小舟橫浦潮初落茅屋壓簷鴉亂啼  
縣市僅誇南貨聚州城獨許北軍棲  
平生自是多離恨一到中原便慘悽

宿高密

杳杳山城倚暮天依依墟里見寒烟  
海邦出息空今日齊地徵求異昔年  
俗鄙誰歌招隱曲道窮虛誦卜居篇

故鄉回望在天末一片歸心對月懸

營邱

空壕廢堞繞營邱一望淒然使我愁  
賜履封侯千古在委端霸業此時休  
鴉啼古木西膠暮雁落平蕪北海秋  
回首江南萬餘里異鄉如此為誰留

次昌樂

世亂何從託此身荒城牢落偶相親  
民情固洽初來日兵氣終悲乍見人  
鉅鹿郡連來羽檄穆陵關近起烽塵

攜家避地頭俱白冠至更堪消息真

北海郡

齊國西行幾日程平原望望怯初經  
雨途車過泥藏轍晴巷馬來塵滿城  
野色北連三晉迴河流東注兩淮清  
中原土俗古云樂老我今多萬里情

五言長律

甲辰元日對雪聯句

三冬不作雪元日乃飛花殆似呈豐兆  
蔡還如獻歲華

曉梅同璀璨戴凍蝶鬪交加疊逕如拖縞徐旋空若攪

車隨風疎復密蔡雜霰整還斜葩借雲為葉戴光凝月

在沙迷汀難辨鷺徐著柳易分鴉詠絮應輸韞蔡吟車

欲過又寒將椒酒敵戴瑩比塞酥嘉刺畫天呈巧徐鋪

張地掩瑕早朝光映笏蔡暝獵勢漫且後臘寧非瑞戴

先春益自詩拂林微見蕊徐綴草淺窺芽暖促庭倪化

蔡陽催瓦雀呀土融偏潤麥戴水活最便茶不雨簷常

滴徐當陰砌或遮詩成燈屢翦蔡坐久鼓頻撾路滑妨

迴騎戴城巖畏奏笳歲寒同在旅徐春至倍思家此日

堪乘興蔡歸舟向若耶戴

七言絕句

由范莊過天平次夷白學士韻

范家里巷子孫稠幾度經過盡白頭自是平生重風義  
豈緣花柳數來遊

秋思二首

我家遠在浙東西萬里悲秋思轉迷欲向長途寄安信

歸鴻飛盡暮鴉啼

往事分明似夢中  
弊衣破帽立西風  
河流不為愁人計  
勢逐長江日夜東

山東九日二首

去年南地過重陽  
種得籬花一丈長  
及到山東詢節物  
傷心惟見葉飄黃

年年此日倍思親  
況在天涯作竄臣  
昌樂城中風雨急  
幾回和淚灑衣巾

憶汪遜齋二首

四明羈客近如何別去今纔一月過記得小齋多野思  
豆花陰裏唱離歌

一身獨向中原去每到前途憶故知折得柳條無寄者  
小橋東畔立多時

送陳仲宣東還

長途漠漠思淒淒人盡東還我獨西家在江南消息斷  
煩君問訊重悲啼



九靈山房集卷九